

45

社121
673
部大:55



文獻通考卷第二百二

鄱陽馬端臨貴與著



經籍考二十九

史職官

漢官儀一卷 續補一卷

陳氏曰後漢軍謀校尉汝南應邵仲遠撰按唐志有漢官五卷漢官儀十卷今惟存此一卷載三公官名及名姓州里而已其全書亡矣李埴季允嘗續補一卷

漢官典儀一卷 續補一卷

乾隆十二年校刊

文獻通考卷二百二 經籍二十九

陳氏曰漢衛尉蔡質撰雜記官制及上書謁見禮式隋志有漢官典職儀式二卷今存一卷李埴亦補一卷其續者皆出於史中採拾

漢官舊儀三卷

陳氏曰漢議郎東海衛宏敬仲撰或云胡廣按宏本傳作漢舊儀四篇以載西京雜事不名漢官今此惟三卷而又有漢官之目未知果當時本書否唐志亦無官字舊在儀注類以其載官制爲多故著於此

唐六典三十卷

鼂氏曰唐元宗撰李林甫張說等注以三公三師三省九寺五監十二衛等列其職司官佐叙其秩品以擬周禮雖不能悉行於世而諸司遵用殆將過半觀唐會要請事者往往援據以爲實韋述以爲書雖成而竟不行過矣然識者謂自唐虞至周有六官而無寺監自秦迄陳有寺監而無六官獨此書兼之故官皆複重也

陳氏曰題御撰李林甫等奉敕注按韋述集賢記注開元十年起居舍人陸堅被旨修六典上手寫白麻紙凡六條曰理教禮政刑事典令以類相從

撰錄以進張說以其事委徐堅思之歷年未知所適又委毋兕余欽韋述始以令式人六司象周禮六官之制其沿革並入注然用功艱難其後張九齡又以委咸二十六年奏草上至今在書院亦不行用今按新書百官志皆取此書卽太宗貞觀六年所定官令也周官六職視周禮六典已有邦土邦事之殊不可考證唐制內外官與周制迥然不同而強名六典可乎善乎范太史祖禹之言曰既有太尉司徒司空而又有尙書省是政出於二也既有尙書省而又有九寺是政出於三也本朝裕

陵好觀六典元豐官制盡用之中書造命門下審覆尙書奉行機事往往留滯上意亦頗以爲悔云中台志十卷

鼂氏曰唐李筌撰起殷周迄隋唐纂輔相邪正之迹分皇王霸亂亡五類以爲鑒戒唐相以李林甫陳希烈附皇道筌上元中自表天寶初追以綴名云

元和百司舉要二卷

陳氏曰唐宰相趙郡李吉甫弘憲撰首稱文班八十四司四百六十員武班二十六司一百八十員

都計六百四十員末稱京文武官及府縣總三千七百九十九員意者當時實數也
具員故事十卷

陳氏曰唐鳳閣舍人梁載言撰以唐官具員附之歷代事迹蓋後人職林職官分紀之類所從始也或稱職祖連珠崇文總目又作具員事跡中興書目惟有七卷三卷缺

官品纂要十卷

陳氏曰唐樂安任戩撰以官品令爲主而階職勳爵隨品具列歷代沿革頗著其要戩舉進士不第

爲此書當太和之丁未

御史臺記十二卷

鼂氏曰唐韓琬撰載唐初至開元御史臺中制度故事以大夫中丞侍御史殿中監察主簿錄事分門載次名氏行事著論一篇叙御史正邪得失進擢誅滅之狀附卷末以爲世戒

陳氏曰自唐初迄開元五年御史姓名行事及官制沿革皆詳著之第八卷爲琬著傳九卷以後爲右臺右臺創於武后廢於中宗歲月蓋不久也末有雜說五十七條

御史臺故事三卷

陳氏曰唐朝集使洛州錄事參軍李構撰
集賢注記二卷

鼂氏曰唐集賢學士韋述撰述在集賢四十年天
寶丙申摭置院始末及院中故事修撰書史之次
及孝明時學士名氏頗善叙事

南宮故事一卷

鼂氏曰不題撰人韋述云開元中劉鄭蘭撰劉儒
者無著述方

翰林志一卷

鼂氏曰唐李肇撰纂唐世翰林院中供奉儀則制
誥書詔之式其後云睿聖文武皇帝裂海岱十二
州爲三道之歲蓋憲宗元和十四年也

承旨學士院記一卷

陳氏曰唐承旨河南元稹微之撰載承旨姓名自
貞元二十一年鄭綱至元和十五年杜元穎并稹
爲十二人末又有李德裕李紳韋處厚三人蓋後
人所益也

翰林學士記一卷

陳氏曰唐侍講學士萬年韋處厚德載撰

翰林院故事一卷

陳氏曰唐學士京兆韋執誼撰

翰林學士院舊規一卷

陳氏曰唐學士馮翊楊鉅文碩撰雜記院中事例及文書格式其祠祭祀版社稷宗廟上至天地用伏惟尚享岳瀆而降只曰尚享此例今人皆莫之知則施之尊卑無別矣鉅宰相收之子其爲學士在昭宗時

重修翰林壁記一卷

陳氏曰唐學士丁居晦撰開元二年也所記姓名

迄於咸通而獨無天寶大歷學士爲不可曉
翰林盛事一卷

陳氏曰唐張著撰記唐朝儒臣美事凡三十八人
史館故事錄三卷

鼂氏曰不題撰人姓名記史館雜分六門迄於五代李獻臣以爲後周史官所著

陳氏曰六門曰叙事史例編修直筆曲筆而終之以雜錄末稱皇朝廣訓則是周朝史官也

翰林續志二卷

鼂氏曰皇朝蘓易簡撰易簡在北門最承太宗睭

遇錄元和以後至國朝翰林故事以續李肇之書
金坡遺事三卷

鼂氏曰皇朝錢惟演載國朝禁林儀式事迹并學
士名氏文元公述真宗禮待儒臣三事附於卷末
陳氏曰題名自建隆至天聖四年凡四十七人自
開元而下合三百一十五人其他典故視前記詳
矣

翰林雜志一卷

鼂氏曰不題撰人輯唐書韋執誼故事元稹承旨
壁記韋來微新樓記杜元穎監院使記鄭璘視草

亭記并詩李宗諤題名記爲一篇或云蘇易簡子
者采其父翰林續志所遺附益之

陳氏曰蘇耆以其父遭遇恩禮之盛續於其後名
次續志

別書金坡遺事一卷

陳氏曰學士澶淵鼂迥昭遠撰因錢惟演寄示遺
事別書真宗待遇恩禮三則於其後

翰苑雜記一卷

陳氏曰學士饒陽李宗諤昌武撰

掖垣叢志二卷

乾隆十二年校刊

之狀身卷三十一 經籍二十九

二

鼂氏曰皇朝宋庠撰景祐中李宗諤始取國初掌
誥名氏刻之於石自爲紀序庠因之成此書王禹
玉頗譏其疎畧裴庭裕載舍人上事知印宰相壓
角至今傳之爲故事而庠書闕焉時爲三字
掖垣續志一卷

鼂氏曰不詳撰人續宋庠書迄元祐六年十一月
陳軒試中書舍人

御史臺記五卷

陳氏曰不知何人作記本朝御史臺事至崇觀間
嘉祐御史臺記五十卷

鼂氏曰右皇朝馮潔已撰御史臺有記始於武后
時姚庭筠其後韓琬韋述嗣有紀著嘉祐中王疇
命潔已續之乃上自太祖建隆之元迄於嘉祐之
末凡一百四年分門載其名氏行事凡三百餘人
潔已拯之子也爲叙傳兩篇述其父事且自叙立
朝本末云與呂獻可傳欽之趙閱道相善而鄙韓
玉汝周孟陽亦可概見其爲人也

新御史臺記

鼂氏曰右皇朝宋聖寵編崇寧中聖寵爲察官續
韓琬書咸用其規式所異者不爲諸人立傳於儀

制勅令格式爲詳後人續至紹興九年

御史臺彈奏格一卷

鼂氏曰右政和中御史中丞蔣猷奏乞委屬官李彌大將本臺制勅令格式彈奏事件編成格目六月書成上之

陳氏宰相拜罷錄一卷

鼂氏曰皇朝陳繹奉詔編起范質止曾公亮所載拜罷之由與實錄不同元祐史臣謂繹多出己意陳氏樞府拜罷錄一卷

鼂氏曰陳繹編起魏仁浦止宋綬

宰相拜罷錄二十四卷

陳氏曰史館修撰范冲元長等撰起建隆元年止紹興六年宰相自范質至張浚執政自趙普至折彥質名記除授年月訓詞亦畧叙在位本末於后執政拜罷錄十卷

鼂氏曰不題撰人自建隆元年止紹興九年按國朝以樞密院及參知政事爲執政改官制後以左右丞兩省侍郎并密院爲執政建炎三年後復用舊制云

國朝輔相年表一卷 續一卷

乾隆十二年校刊

經籍二十九

陳氏曰同知太常禮院開封陳繹和叔撰自建隆
庚申迄治平丙午續自丁未迄紹興十四年稱臣
易記而不著姓當是李易也時方自給事中奉祠
其曰私題臣易之次者其書蓋未必上而私續之
耳自後接於嘉定則後人所益也

百官公卿表一百四十五卷

書錄解題作十五卷

鼂氏曰皇朝司馬光君實等撰熙寧中光以翰林
學士兼史館修撰建議欲據國史旁采異聞叙宋
興以來百官除拜效漢書作表以便御覽詔許之
光請宋敏求同修及敏求卒又請趙彥若繼之歷

十二年書成

公自序曰唐初職事官有六省一臺九寺三監十
六衛十六府之屬其外又有勳官散官勳官以賞
戰多散官以褒勤舊故必折馘執俘然後賜勳積
資累考然後進階以其不可妄得故當時以爲榮
及高宗東封武后預政欲求媚於衆始有汎階自
是品秩浸訛朱紫日繁矣肅宗之後四方糜沸兵
革不息財力屈竭勳官不足以勸武功府庫不足
以募戰士遂并職事官通用爲賞不復選材無所
愛吝將帥出征者皆給空名告身自開府至郎將

聽臨事注名後又聽以信牒授人有至異姓王者於是金帛重而官爵輕矣或以大將軍告身纔易一醉其濫如此重以藩方跋扈朝廷畏之窮極褒寵苟求姑息遂有朝編卒伍暮擁節旄夕解提衣旦紆公衮者矣流及五代等表益紊三公端揆之貴施於軍校衣紫執象之榮被於胥史名器之亂無此爲甚大宋受命承其餘弊方綱紀大基未暇釐正故臺省寺監衛率之官止以辨班列之崇卑制廩祿之厚薄多無職業其所謂官者乃古之爵也所謂差遣者乃古之官也自餘功臣檢校官散

官階勲爵邑徒爲繁文人不復貴凡朝廷所以鼓舞羣倫緝熙庶績者曰官曰差遣曰職而已於三者之中復有名同實異交錯難知又遷徙去來常無虛日欲觀其大畧故自建隆以來文官知雜御史以上武官閤門使以上內臣押班以上遷除黜免刪其繁冗存其要實以倫類相從以先後相次爲百官公卿表云

陳氏曰此書本入職官類以稽古錄序所謂建隆接熙寧臣又著之於百官表卽此書蓋與通鑑相與表裏故著之編年類彙志有一百四十二卷未

詳

巽岩李氏序曰司馬光以熙寧二年建議請撰宋興以來百官公卿表元豐四年表成凡十卷詔送編修院世莫知其書何如也按光集有百官公卿表總序文官知雜御史以上武臣閣門使以上內臣押班以上其遷出咸表見之初不紀其卷第某家藏舊書有所謂百官公卿表者七卷宰相參知政事樞密使副爲一卷三師三公左右僕射東宮三師三少賓客爲一卷使相宣徽節度留後觀察爲一卷尚書丞郎給諫常侍爲一卷知開封府三

司使學士舍人御史中丞爲一卷觀文資政端明樞密侍講讀學士爲一卷十二衛上將軍六軍統軍爲一卷他官皆止天禧惟宰相執政盡熙寧疑此表則光等所修也然卷第比實錄所載尙缺其三倫類往往顛倒紛錯而總序所稱閣門使及押班以上皆絕不見豈三卷所缺卽此表者而傳寫偶失之歟若然則他官除拜俱當以元豐爲限矣不應自天禧以來遽絕筆但詳於宰相執政也且當時修此表歷十二年乃成其久如是其疎畧顧如是是必不然當某家舊藏不得其純全耳某能

薄不堪世用頗願盡力於史學而本朝故事尤切
欣慕某既不自料故追繼光作將以昭明祖宗之
盛德大業使衆說咸會於一不敢鑿空架虛熒惑
視聽固當事事謹其月日如古春秋乃可傳信彼
百官沿革公卿除拜皆事之最大者也年表又安
可缺因取舊七卷亟整治之續編其年至宣和止
元符以前皆從實錄治平而上又參諸正史元符
以後不免憑所傳聞國書既非人間通有辛苦求
得之脫簡誤字絕無他本可校於先後次序諒多
抵牾但憑所傳聞則宣和距元符二十五年茲

不詳此皆某之罪也改而正諸必有所待年表舊
止七卷卷第不均今釐析之與某所續編者總一
百四十二卷凡所增益倫類具之目錄其故事則
當別見續紀此不重列

按此序則溫公本書止十卷巽岩續編推而廣之
爲一百四十二卷鼂氏所言乃巽岩續書非溫公
本書也陳氏以爲未詳者是未見巽岩之書然又
以溫公之書爲十五卷則不知其何所本也

鼂氏在巽

岩之前安得見其書所謂一百四十五卷者決非巽岩之書也

職林二十卷

陳氏曰集賢院學士錢唐楊侃撰咸平二年所序有胡昉者明道二年作後序增益事實七百四十五條而以新續標之侃端拱進士晚爲知制誥避真宗舊諱更名大雅歐陽公其壻也集中有墓誌輔弼名對四十卷 目錄一卷
鼂氏曰皇朝劉顏撰纂西漢迄五代羣臣應對之名者汲黯有天子置公卿輔弼之臣寧令從諛承意陷主不誼之言顏取以名其書天聖初馮元爲侍講上之顏常爲令坐事免由是詔復其官
職官分紀五十卷

陳氏曰富春孫逢吉彥同撰大抵本職林而增廣之條例精密事實詳備矣秦少游序之元祐七年也

官制學制名一卷

陳氏曰司馬光撰

唐職林三十卷

陳氏曰石埭尉維揚馬永錫明叟撰以唐六典爲主而附以新史所載事實頗采傳記歌詩之屬政和乙未天台左譽序

朝集院須知一卷

陳氏曰無名氏錄承平時京朝官得替回朝見禮
式

皇宋館閣五卷

陳氏曰不著名氏所記止於元祐中興館閣書目
云秘閣校理宋匪躬撰又云共八門元十五卷存
十一卷今本止五卷不見門類前三卷又混而爲
一意未必全書也

蓬山志五卷

陳氏曰秘書少監劔川羅疇疇老撰凡十五門崇
寧四年序

麟臺故事五卷

鼂氏曰皇朝程俱撰紹興初復館職首入館纂集
舊聞成十二篇予所藏書斷自南渡之前獨此書
以載官制後事爲詳故錄之

陳氏曰俱在承平時凡三入省故其見聞爲詳

中興館閣錄十卷 續十卷

陳氏曰秘書監天台陳騃叔進撰淳熙中騃長蓬
山與同僚錄建炎以來事爲此書李燾仁父爲序
續錄者後人因舊文增附之耳

巽岩李氏序曰上世官修其方故物不坻伏後世

弗安厥官其方莫修職業因以放失夫方云者書也究其本原事迹及朝夕所當思營者悉書之法術具焉使居是官者奉以周旋雖百世可考爾周官三百六十官各有書小行人適四方則物爲一書多至五書蓋古之人將有行也舉必及三惟始衷終依據審諦則其設施斯可傳久六龍駐蹕臨安踰四十年三省樞密院制度尚稽復舊惟三館秘閣巋然傑出非百司比自唐開元韋述所集記注元祐間宋宣獻之孫匪躬作館閣錄紹興改元程俱致道作麟臺故事朱氏皆祖韋氏而程氏故

事并國初他則多闕蓋未知其有宋錄也惜最後四卷俄空焉余屢蒐采弗獲欲補又弗暇每每太息今所編集第斷自建炎以來凡物巨細靡有脫遺視程氏誠當且密官修其方行古道者不當如是耶昏忘倦游喜見此書乃援筆爲之序

翰林羣書三卷 翰林遺事一卷

陳氏曰學士承旨番易洪遵景嚴自李肇而下十一家及年表中興後題名共爲一書而以其所錄遺事附其末總爲三卷遺事錄諸書所未及者洪氏父子兄弟四人入翰苑

續史館故事一卷

陳氏曰著作佐郎曲阿洪興祖慶善撰記國朝史館事迹以續舊編

祖宗官制舊典三卷

陳氏曰直龍圖閣東萊蔡惇元道撰大畧以爲元豐用官階寄祿雖號正名而流品混淆爵位輕濫故以祖宗舊典與新制參稽互考而論其得失元道文忠公參政齊之姪孫而翰林學士延慶之子渡江卒於涪陵尹和靖焯嘗題其墓

官制舊典正誤一卷

陳氏曰無名氏

國朝官制沿革一卷

陳氏曰黃琮元禮撰

職官記一卷

陳氏曰大理少卿蜀人張續季長撰專載新舊遷轉之異亦以寄祿爲未然也以上三家皆附蔡氏書後

官制新典十卷

陳氏曰熊克撰其書以元豐新制爲主而元祐之畧加通變崇政之恣爲紛更皆具列焉

聖朝職畧二十卷

陳氏曰熊克撰做馬永錫唐職林考其廢置因革亦頗采故事摘舊制誥中語附焉其書猶草創未成蓋應用之具也

續百官公卿表二十卷 質疑十卷

陳氏曰兵部尚書永嘉蔡幼學行之撰續溫公舊書起熙寧至靖康質疑者考異也

職源五十卷

陳氏曰大理司直金華王益之行甫撰亦簡牘應用之書也而專以今日見行官制爲主蓋中興以

後於舊制多所併省故也

元輔表一卷

陳氏曰龔頤正撰專錄宰相不及執政

漢官考六卷

陳氏曰知金州清江徐筠孟堅撰以百官表官制爲主而紀傳及注家所載皆輯而錄之

漢官總錄十卷

陳氏曰王益之撰大較亦如前書

縣法一卷

陳氏曰北京留守溫陵呂惠卿吉甫撰曰法令詞

訟刑獄簿歷催科給納災傷盜賊勸課教化凡十門爲縣之法備於此矣雖古今事殊而大體不能越也惠卿小人之雄於才術固優然法令居首而教化乃居其末不曰俗吏而謂之何哉

縣務綱目二十卷

陳氏曰贛陽劉鵬撰凡四十四門四百七十餘事其說不止於作縣而事關縣務者爲多焉元符庚辰序

作邑自箴十卷

陳氏曰李元弼持國撰政和丁酉序

中興百官題名五十卷

陳氏曰監察御史臨川何異同叔撰首卷爲宰輔拜罷錄餘以次列之刻浙漕司其後以時增附渡江之初庶務草創諸司間有不可考者多缺之

齊齋臺諫論二卷

陳氏曰尚書雲川倪思正父撰嘉定初更化矯韓氏用事之弊於是爲論三篇言爲之鷹犬者罪在臺諫已而其弊自若也則又爲牘論六篇言其情狀益精詳凡爲臺諫之所以得所以失者至矣盡矣

金國官制一卷

陳氏曰虜雍僞大定年所效竊取唐及本朝舊制以文其腥膻之俗馬非馬驢非驢龜茲王所謂羸者邪

文獻通考卷第二百二

文獻通考卷第二百三

鄱 陽 馬 端 臨 貴 與 著

經籍考三十

史 職官 刑法

歷代宰相年表三十四卷

李燾仁甫撰其自序略曰古之所謂相者一而已初未嘗使他人參貳乎其間堯相舜舜相禹禹相臯陶臯陶既沒乃相益湯相伊尹傳所謂仲虺爲湯左相者不足信也周家並建三公而一公實兼冢宰故旦奭夾輔成王而誕保文武受命者專屬

之旦旦歸於豐奭乃專政蓋其名三公其實一相耳自秦以降名實浸以兩失間有瓌偉絕特負賢相之稱功烈赫然著見於一時者亦必得君之專歷年之久而莫或參貳之故也權出於一而莫或參貳之雖姦雄或得以肆其惡攘竊天下傾國敗家不可禁遏然而一相之任終不可分者唐虞夏商之成法也彼徒見趙高王莽曹操司馬懿其禍如此之酷也而不察夫帝王之所以隆盛其爲利蓋亦博哉不能還治其本而反疑其末並列兼制使相牽引而相遂失其職矣夫任相不獲其利而

蒙其禍是君之不明非相之權果不可使出於一也旣奪其職分其權則所謂相者特一大有司耳其何以總百官治萬事而亮天工邪凡相取其德耳故曰惟尹躬暨湯咸有一德而舜禹臯陶之胥命必孜孜以德爲言彼誠知所本者歟本之不知則其選用益雜而多端矣選用雜而多端故其稱號亦顛倒錯亂無有定制或居其位而不得聞其政或當軸秉鈞而身乃爲他官名實糾紛賢不肖溷淆其多或至十三四人而其少猶不下四五輩古所謂相寧若此乎然而治亂安危所係今猶古

也其所以得相及所以失相者要不可不知按諸
舊史惟前漢及唐頗有譜牒其他率皆不具脫略
牴牾迷失本真乃旁搜遠取推究前後悉用司馬
遷經緯之法追爲年表起漢元訖周顯德昔之參
機務執樞要者莫不咸在事有本末附見於下否
則略之使其人與其官皆相傳而不絕觀宰相之
出處進退何如而天下安危治亂在目矣其足
以補前代之缺文揭當今之遠鑑乎合一千五百
三十四年離爲三十四卷

天禧以來御史年表

李燾仁甫撰其自序曰御史法官也其責不專於
言而天禧選用則與諫官俱任言責臺雖有等級
也而義所當擊則卑者亦得徑行其權勢氣力又
出諫官上祖宗之聖算神術備矣今亦斷自天聖
以來取丞雜三院姓名悉列之表若其人必天子
自擇而宰相優容之乃能有濟猶諫官也
天禧以來諫官年表

李燾仁甫撰其自序略曰古者自公卿大夫士至
於工商莫不皆有言責輻輳並進而天子斟酌焉
未嘗以言責專付一官以言責專付一官則由漢

武帝失之武帝誠不喜諫者初置諫大夫猶未限員東京循舊弗改後乃寢微晉洎江表絕不復置拓跋魏復置其員亦不可知高齊緣孝經之文始有七人之限夫以天下之衆而敢言者才七人尚足謂治邪恭惟祖宗明目達聰協於虞舜任言責者不一天禧別置諫院禮秩優異他官莫擬崇廣言路諫官御史權勢氣力乃與宰相等蓋當時所用諫官御史必取天下第一流非學術才行俱備爲一世所高者莫在此位或誤選試旋加汰斥言而當者曾不十年徑登台輔其名迹皆可考見嗚

呼盛哉今斷自天禧置院以來作諫官年表并列古今之變爲二說以附著之其一曰諫官必天子自擇而宰相勿與其二曰宰相雖不得與擇諫官必優容之乃克有濟

右職官

律文十二卷 音義一卷

陳氏曰自魏李悝漢蕭何以來更三國六朝隋唐因革損益備矣本朝天聖中孫奭等撰音義自名例至斷獄歷代異名皆著之

唐令三十卷 式二十卷

陳氏曰唐開元宋璟蘇頌盧從愿等所刪定藝文志卷數同更同光天福校定至本朝淳化中右贊善大夫潘憲著作郎王泗校勘其篇目條例頗與今見行令式有不同者
南豐曾氏序曰唐令三十篇以常員定職官之任以府衛設師徒之備以口分永業爲授田之法以租庸調爲歛財役民之制雖未及三代之政然亦庶幾乎先王之意矣讀其書嘉其制度有庶幾乎古者而惜其不復行也故綴其大要可記者論之於此焉

刑統三十卷

鼂氏曰皇朝竇儀以尚書判大理寺與法官蘇曉奚嶼張希護等修定古者議事以制使民不知所爭也後世鑄刑書使民知所避也雖若不同所以爲民之意則一然議事以制者委重於人鑄刑書者委重於法委重於人則上之人將輕重由心以虐其下委重於法則下之人將徵於書以慢其上其爲失也亦均要之以人行法不使偏重然後爲得耳

陳氏曰初范質旣相周建議律條繁廣輕重無據

特詔詳定號大周刑統凡二十一卷至是重加詳
定建隆四年頒行

金科易覽三卷

鼂氏曰崇文總目有唐趙綽金科易覽一卷田氏
書目有蕭緒金科易覽三卷當是綽初撰一卷緒
刪改析之爲三爾

疑獄三卷

鼂氏曰晉和凝撰纂史傳決疑獄事其上卷凝書
也下中卷凝子蒙所續

天聖編勅三十卷

鼂氏曰天聖中宋庠龐籍受詔改修唐令參以今
制而成凡二十一門官品一戶二祠三選舉四考
課五軍防六衣服七儀制八鹵簿九公式十田十
一賦十二倉庫十三廩牧十四關市十五補亡十
六疾醫十七獄官十八營繕十九喪葬二十雜二
十一

斷例四卷 元豐斷例六卷

鼂氏曰皇朝王安石執政以後士大夫頗重意律
令此熙豐紹聖中法寺決獄比其六卷則元豐中
法寺所斷罪節文也

刑名斷例十卷

陳氏曰不著名氏以刑統勅令總爲一書惜猶未備也

嘉祐驛令三卷

陳氏曰三司使梁國張方平安道等修定前一卷爲條貫勅後二卷爲則例令官吏幫支驛券衙官廉從之類皆據此也

元豐廣案二百卷

晁氏曰皇朝元豐初置新科明法或類其所試成此書

元豐刑部敘法通用一卷

陳氏曰未載申明至紹興淳熙以後

諸路將官通用勅二十卷

晁氏曰皇朝崇寧中修

刑統賦兩卷

晁氏曰皇朝傅霖撰或人爲之注

決獄龜鑑二十卷

晁氏曰皇朝鄭克編次五代和凝有疑獄集近時趙仝有疑獄事類皆未詳盡因增廣之依劉向晏子春秋舉其綱要爲之目錄分二十門

陳氏曰克因和氏之書分二十門推廣之凡二百七十六條三百九十五事起鄭子產迄本朝律心四卷

鼂氏曰未詳撰人纂刑統綱要也

宣和軍馬司勅十三卷 令一卷

陳氏曰宣和時所修

紹興勅十三卷 令五十卷 格三十卷 式三十卷 政和以後赦十五卷

鼂氏曰皇朝張守等紹興中被旨編修

紹興刑統申明一卷

陳氏曰開寶以來累朝訂正與刑統並行者

慶元勅十二卷 令五十卷 格三十卷 式三十卷 目錄一百二十二卷 隨勅申明十二卷總二百五十六卷

陳氏曰丞相豫章京鏗仲遠等慶元四年表上國朝自建隆以來世有編勅每脩定號爲新書中興至此凡三脩矣其有續降指揮謂之後勅以待他時脩入云

紹興貢舉法五十卷

陳氏曰丞相万俟卨等紹興二十六年表上

紹興監學法二十六卷 目錄二十五卷 申明七卷

對修釐正條法四卷共二十六卷

陳氏曰宰相秦檜等紹興十三年表上

嘉泰條法事類八十卷

陳氏曰天台謝深甫子肅等嘉泰二年表上初吏部七司有條法總類淳熙新書既成孝宗詔倣七司體分門脩纂別爲一書以事類爲名至是以慶元新書脩定放降此書便於檢閱引用惜乎不併及刑統也

嘉定吏部條法總類五十卷

陳氏曰嘉定中以開禧重修七司法并慶元海行法在京通用法大宗正司法參定凡改正四百六十餘條視淳熙總類增多十卷七年二月放行役法撮要一百八十九卷

陳氏曰提舉編條宰相京鏜等慶元六年上自紹興十七年正月以後至慶元五年七月以前爲五十五門又八十二小門門爲一卷外爲參詳目錄等卷雖多而文甚少其書於州縣差役極便於引用

右刑法

文獻通考卷第二百三

文獻通考卷第二百四

鄱 陽 馬 端 臨 貴 與 著

經籍考三十一

史 地理

山海經十八卷

鼂氏曰大禹製晉郭璞傳漢侍中奉車都尉劉秀校定表言禹別九州而益等類物善惡著此書皆聖賢之遺事古文明著者也大父嘗考之於書有曰長沙零陵鴈門皆郡縣名又自載禹鯀似後人因其名參益之

陳氏曰漢侍中奉車都尉臣秀所校祕書秀卽劉歆也晉郭璞注按唐志二十三卷音二卷今本錫山尤袤延之校定世傳禹益所作其事見吳越春秋曰禹東巡登南岳得金簡玉字通水之理遂行四瀆與益共謀所至使益疏而記之名山海經此其爲說恢誕不典司馬遷曰言九州山川尚書近之矣至禹本紀山海經所書怪物余不敢言之也可謂名言孰曰多愛乎故尤跋明其非禹伯翳所作而以爲先秦古書無疑然莫能名其何人也洪慶善補注楚辭引山海經淮南子以釋天問而朱

晦翁則曰古今說天問者皆本此二書今以文意考之疑此二書本皆緣解天問而作此可以破千載之惑古今相傳旣久姑以冠地理書之錄

山海圖經十卷

鼂氏曰皇朝舒雅等撰雅仕江南韓熙載之門人也後入朝數預修書之選閩中刊行本或題曰張僧繇畫妄也

水經四十卷

鼂氏曰漢桑欽撰欽成帝時人本經三卷後魏酈道元注史稱道元好學歷覽奇書撰注水經行於

世

陳氏曰欽邯鄲書目以爲漢人鼂氏言成帝時人當有所據按唐志注或云郭璞撰又杜氏通典按水經晉郭璞注二卷後魏酈道元注四十卷皆不詳所撰者名氏亦不知何代之書佑謂二子博瞻解釋固應精當然其經云濟水過壽張則前漢壽良縣光武更名又東北過臨濟則前漢狄縣安帝更名又云河水過湖陸則前漢湖陵縣章帝更名又云汾水過河東郡永安則前漢葷縣順帝更名故知順帝以後纂序也詳水經所作殊爲詭誕全

無憑據按後漢郡國志濟水王莽末因旱渠塞不復截河南過統順帝時所撰都不詳悉其餘可知景純注解又甚疎畧亦爲迂怪以其僻書人多不覩謂其審正未之精也

十道志十三卷

鼂氏曰唐梁載言撰唐分天下爲十道所載頗詳博其書多稱咸通中沿革蓋唐末人也

陳氏曰其書廣記備言頗有可采載言不見於史未定爲何朝人此書有太和以後沿革當是唐末人

唐十道圖一卷

陳氏曰唐宰相趙郡李吉甫弘憲撰首載州縣總數文武官員數俸料唐志云十卷今不分卷

元和郡縣志四十卷

陳氏曰李吉甫撰自京兆至隴右凡四十七鎮篇首皆有圖今圖不存

太平寰宇志二百卷

鼂氏曰皇朝樂史等撰太平興國中盡平諸國天下一統史悉取自古山經地志考正訛謬纂成此書上之

圖經

陳氏曰其書起自河南周於海外

鼂氏曰皇朝李昉撰

九域志十卷

鼂氏曰皇朝王存被旨刪定總二十三路京府四次府十州二百四十二軍三十七監四縣一千一百三十五

陳氏曰存與曾肇李德芻等共刪定名元豐九域志

輿地廣記三十八卷

鼂氏曰皇朝歐陽忞纂自堯舜以來至於五代地理沿革離合皆繫以今郡縣名或云無所謂歐陽忞者特假名以行其書耳

陳氏曰政和中作其前三卷以今之郡縣繫於前代郡國之下其序曰以今州縣求於漢則爲郡以漢郡縣求於三代則爲州三代之九州散而爲漢之六十餘郡又分而爲今之三百州雖或離或合不可討究而吾胸中則已了然矣漢郡國一百三今云六十餘郡不可曉也忞當是文忠族孫行名皆連心字

春秋地譜十二卷

鼂氏曰皇朝楊湜編十三國地皆釋以今州縣名并爲圖於其後蓋常氏已嘗有此書而湜增廣焉
洽聞記三卷

鼂氏曰唐鄭常撰記郡國舊事故附之地理類職方機要四十卷

鼂氏曰不題撰人姓名序云本新舊九域志上據歷代史旁取左氏水經通典且采舊聞參以小說黜謬舉真紬成此書其間載政和間事蓋當時人也

地理指掌圖一卷

陳氏曰蜀人稅安禮撰元符中欲上之朝未及而卒書肆所刊皆不著名氏亦頗闕不備此蜀本有涪右任慥序言之頗詳

歷代疆域志十卷

陳氏曰臨川布衣吳澥撰

輿地紀勝二百卷

陳氏曰知江寧縣金華王象之撰蓋以諸郡圖經節要畧而山川景物碑刻詩詠粗無所遺行在宮闕觀寺寔冠其首關河版圖之未復者猶不與焉

眉山李說齋季允爲之序

輿地圖十六卷

陳氏曰王象之撰紀勝逐州爲卷圖逐路爲卷其搜求亦勤至西蜀諸郡尤詳其兄觀之漕夔門時所得也

皇朝方域志二百卷

陳氏曰東陽布衣王希先撰凡前代謂之譜十六譜爲八十卷本朝謂之志爲一百二十卷譜叙當時事實而注以今之郡縣志述今日疆理而繫於古之州國古今參考譜志互見地理學之詳明者

無以過此矣嘉熙二年上於朝得永免文解其父
珪本建寧人已未進士試詞科不中頗該洽希先
述其遺藁以成此書

六合掌運圖一卷

鼂氏曰不著名凡爲四十四圖首列禹跡次爲中
興後南北二境其後則諸邊關險要以及虜地疆
界亦著之

燕吳行役記

陳氏曰不著名氏大中九年崔鉉鎮淮南諸鎮畢
賀爲此記者燕帥張允伸所遺僚佐道中記所經

行郡縣道里及事跡也

南行記三卷

鼂氏曰王仁祐撰晉天福二年仁祐被命使高季
興記自汴至荆南道塗賦詠及飲宴倡酬殆百餘
篇

江行錄一卷

陳氏曰真州教授勾穎紹聖三年所序云太守張
公所修也張不著名自真而上直抵荆南自岳而
分旁徵衡永自湖口而別則東入鄱陽南至廬陵
程期岸次風雲占候時日吉凶與夫港派灘磧磯

泐莫不具載行江者賴焉

三輔黃圖三卷

鼂氏曰按經籍志有黃圖一卷記三輔宮觀陵廟明堂辟雍郊時等卽此書也不著撰人姓名其間頗引劉昭漢志然則出於梁陳間也

陳氏曰按唐志一卷今分上下卷載秦漢間宮室苑囿甚詳多引用應劭漢書解而如淳顏師古復引此書爲據意漢魏間人所作然中興書目以爲崇文總目及國史志不載疑非本書也程氏雍錄辯之尤悉

長安志十卷

鼂氏曰皇朝宋敏求撰敏求因韋氏所記搜采羣書罔有遺軼二紀而成凡府縣之政官尹之職河渠關塞之類至於風俗物產宮室道街無不詳備世稱其博趙若彥爲之序

陳氏曰與河南志二書凡例微不同然漢唐舊都遺事詳矣

河南志二十卷

鼂氏曰宋敏求撰以韋述西京記爲未備演之爲長安河南志司馬光爲之序以爲考之韋記其詳

不啻十餘倍開編粲然如指諸掌真博物之書
關中記一卷

陳氏曰晉葛洪稚川撰所載殊簡畧

長安圖記一卷

陳氏曰丞相汲公呂大防知永興軍以爲正長安
故圖著其說於上今信安郡有此圖而別錄其說
爲一篇

雍錄十卷

陳氏曰吏部尚書新安程大昌泰之撰周秦漢隋
唐五代皆都雍故以名錄前史及黃圖宋志異同

往往辯訂其辯黃圖有唐縣名且晉灼所引黃圖
皆今書所無蓋唐人續成之非見漢事者

游城南記一卷

鼂氏曰皇朝張禮撰禮秦人元祐中與陳明微自
長安城南探竒訪古以抵樊川因次之爲記

洛陽伽藍記三卷

鼂氏曰元魏羊銜之撰後魏遷都洛陽一時王公
大夫多造佛寺或捨其私第爲之故僧舍多爲天
下最銜之載其本末及事跡甚備

陳氏曰銜之以爾朱之亂城郭邱墟追述斯記

洛陽名園記一卷

鼂氏曰皇朝李格非撰記洛中園圃自富鄭公以下十九所其論以爲洛陽之盛衰爲天下治亂之候園圃之興廢爲洛陽盛衰之候則園記之作豈徒然哉公卿大夫忘天下治忽欲退享此樂得乎唐之末路是也

陳氏曰格非禮部員外郎以不肯與編元祐奏章入黨籍國史文苑有李易安居士清照者其女也格非苦心爲文而集不傳館中亦無有惟錫山尤氏有之文鑑僅存此跋蓋未嘗見其全集也

東京記

鼂氏曰皇朝宋敏求編開封坊巷寺觀官廨私第所在及諸故實極精博

陳氏曰上卷爲宮城周五里唐宣武節度治所建隆三年廣城之北隅用洛陽宮殿之制修之中卷爲舊城周二十一里一百五十步唐汴州城也號闕城亦曰裏城下卷爲新城周四十八里二百三十三步周世宗所築羅城也號曰國城又曰外城三城之內宮殿官府坊巷第宅寺觀營房次第記

之

東京夢華錄一卷

陳氏曰稱幽蘭居士孟元老撰元老不知何人少游京師晚值喪亂之後追述舊事兼及國家典祀里巷風俗以其首載京城宮闕橋道坊曲尤詳故繫之地理類

鄴中記一卷

陳氏曰不著名氏記自魏而下及僭偽都鄴者六家宮殿事迹按唐志有鄴都故事二卷肅代時馬溫所作今書多引之

相臺志十二卷

鼂氏曰皇朝韓琦欲編次未成郡守李琮命郡文學掾陳申之效宋敏求河南志成此書

晉陽事跡雜記十卷

陳氏曰唐河東節度李璋纂序言十四卷唐志亦同今刪爲十卷蓋治平中太原府所刻本也從莆田李氏借錄自南渡以來關河阻絕圖志泯亡得見一二僅存者猶足以發傷今思古之嘆然唐并州治晉陽太原二縣國初克復徙治陽曲而虛其故城二縣後皆并省則唐之故跡皆不復存矣

臨安志十五卷

陳氏曰府帥吳興周淙彥廣撰首卷爲行在所於宮闕殿閣全不記載籍曰禁省嚴秘不敢明著其視宋次道東京記何其大不侔其他沿革亦多疏畧然淙有才具其尹京開湖濬河皆有成緒今城中河道通利民戶爲脚船以濟行旅者蓋自此始

吳興雜錄七卷

陳氏曰唐湖州刺史張文規撰末載義興造茶及風物雜占甚詳文規張薦之後彥遠之子其爲郡當會昌二年

吳興紀統十卷

陳氏曰攝湖州長史左文質撰分門別類古事頗詳序稱甲辰歲者本朝景德元年也

吳興志二十卷

陳氏曰樞密院編脩郡人談鑰元時撰嘉泰元年也其爲書草率未得爲盡善

蘇州圖經六卷

陳氏曰翰林學士饒陽李宗諤昌武等撰景德四年詔以四方郡縣所上圖經刊脩校定爲一千五百六十六卷以大中祥符四年頒下今皆散亡館中僅存九十八卷余家所有惟蘇越黃三州刻本

耳

吳郡圖經續記三卷

陳氏曰祕書省正字郡人朱長文伯原撰記祥符以後事亦頗補前志之缺遺長文吳中名士病廢不仕自號樂圃卒於元符元年

吳地記一卷

陳氏曰唐陸廣微撰郡人也多記古吳國事唐末有秀州天禧中始割嘉興縣置故此記合二郡爲

一

吳郡志五十卷

陳氏曰參政郡人范成大至能撰書始成未行而石湖沒有求附見某事而弗得者譁曰此非石湖筆也太守不能決藏其書學官然周益公爲范墓碑述所著書目有焉及紹定初桐川李壽朋儔老爲守始取而刻之而書止於紹興其後事實俾僚屬用褚少孫史記例補成之趙南塘履常作序訂其爲石湖書不疑且謂郡士龔頤正滕歲周南皆常薦所聞於公者而龔尤多

鎮江志三十卷

陳氏曰教授天台盧憲子章撰

乾隆十二年校刊

文獻通考卷三百四 經籍三十一

七

新定志八卷

陳氏曰郡守東平董弁令升撰紹興己未也淳熙甲辰武義陳公亮重脩

嘉禾志五卷 故事一卷

陳氏曰郡守毘陵張元成撰爲書極草草

毘陵志十二卷

陳氏曰教授三山鄒補之撰

越州圖經九卷

陳氏曰李宗諤祥符所上也未有祕閣校理李垂邵煥脩及覆脩名銜然則書成於衆手而宗諤特

提總其凡耳

會稽志二十卷

陳氏曰通判吳興施宿武子郡人馮景中陸子虛朱鼐王度等撰陸放翁爲之序首稱禹會諸侯而以思陵巡守陞府配之氣壯文雅蓋奇作也嘉泰辛酉六年己七十七矣未幾始落致仕爲史官至八十五歲乃終其筆力老而不衰於此序見之

會稽續志八卷

陳氏曰梁國張湔撰續記辛酉後事而亦補前志之遺前志無進士題名此其尤不可遺者也

赤城志四十卷

陳氏曰國子司業郡人陳耆卿壽老撰其前爲圖
十有三卷

赤城續志八卷

陳氏曰郡人吳子良拾其所遺續載之

赤城三志四卷

陳氏曰郡人林表民逢吉撰紹定己丑水壞城脩
治興築本末詳焉

四明志二十一卷

陳氏曰贛州錄事參軍廬陵羅璿脩時胡渠仲方

尚書爲守璿其鄉人也

明越風物志七卷

鼂氏曰皇朝姜嶼撰以明州本越地故曰明越又
以郭璞注爾雅多引江東故詳載其風物云

永嘉譜二十四卷

陳氏曰禮部侍郎郡人曹叔遠器遠撰曰年譜地
譜名譜人譜時紹熙三年太守宛陵孫楸屬器遠
哀集創爲義例如此器遠庚戌進士蓋初第時也

永寧編十五卷

陳氏曰待制郡人陳謙益之撰漢分章安之東甌

鄉爲永寧今永嘉四邑是也故以名編時嘉定九年留元剛茂潛爲太守

東陽志十卷

陳氏曰樞密鄱陽洪遵景嚴撰紹興二十四年爲通判時所作

括蒼志七卷

陳氏曰教授曾賁撰乾道六年太守四明樓璩叔韞序

括蒼續志一卷

陳氏曰郡人陳百朋撰

信安志十六卷

陳氏曰教授衛玠撰太守四明劉屋也實嘉定己卯

信安續志二卷

陳氏曰教授葉汝明撰袁甫廣徽紹定初也

文獻通考卷第二百四

文獻通考卷第二百五

鄱陽馬端臨貴與著

經籍考三十二

史地理

建康志十卷

陳氏曰府帥史正志志道撰乾道五年

續建康志十卷

陳氏曰府帥吳琚居父以郡人朱舜庸所編詮次

與前志並行時慶元六年

六朝事迹一卷 南朝宮苑記二卷

乾隆十二年校刊

文獻通考卷三十二 經籍三十二

陳氏曰不知何人所作記六朝故都事迹頗爲詳盡

姑孰志五卷

陳氏曰教授長樂林桷子長撰太守楊愿原仲也時淳熙五年

新安志十卷

陳氏曰通判贛州郡人羅願撰時淳熙二年太守則趙不悔也

秋浦志八卷

陳氏曰太守南昌胡兆乾道八年修

秋浦新志十六卷

陳氏曰三山王伯大幼學以前志缺陋重修時以庾節攝郡事端平丙申也

南康志八卷

陳氏曰郡守朱端章撰淳熙十二年

桐汭新志二十卷

陳氏曰教授錢塘趙子直撰紹定五年也太守林棐序

豫章職方乘三卷 後乘十二卷

陳氏曰郡人洪芻駒父宣和己亥撰乘取晉乘爲

名後乘淳熙十一年太守程叔達序

潯陽志十二卷

陳氏曰迪功郎鼂百揆元采撰淳熙三年太守開封曹訓爲序

宜春志十卷

陳氏曰袁州教授南城童宗說撰太守李觀民也
宜春傳信錄三卷

鼂氏曰皇朝羅誘述載其地古今人物及牧守政迹山川靈異之跡

袁州孚惠廟錄一卷

鼂氏曰皇朝張慤撰記仰山二神靈異之跡

盱江志十卷 續十卷

陳氏曰郡守胡舜舉紹興戊寅俾郡人童宗說黃敷忠爲之續志慶元五年三山陳岐修亦郡守也

富川志六卷

陳氏曰軍學教授括蒼潘廷立撰太守趙善宣紹熙四年也軍治永興本富川縣故名

南安志二十卷 補遺一卷

陳氏曰太守方崧卿教授許開修

廣陵志十二卷

陳氏曰教授三山鄭少魏江都尉會稽姚一謙撰
紹熙元年太守鄭興裔也

楚州圖經二卷

陳氏曰教授雪川吳莘商卿撰太守毘陵錢之望
大受時淳熙十三年

永陽志三十五卷

陳氏曰滁守林嘯命法曹龔惟蕃修

吳陵志十卷

陳氏曰不著名氏淳熙壬寅所修後三年乙巳太
守錢塘萬鍾元亨屬僚佐參正而刻之泰州在唐

爲吳陵縣

高郵志三卷 續修十卷

陳氏曰興化縣主簿孫祖義撰郡守趙不慙刻之
淳熙四五年間也其書在圖志中最爲疏畧嘉定
中守汪綱再修稍詳定矣

都梁志八卷 續一卷

陳氏曰郡守霍箎教授周之瑞修紹熙元年也續
志嘉泰壬戌郡守耿與義序

合肥志四卷

陳氏曰合肥主簿唐錡撰郡守鄭興裔也時淳熙

十五年

同安志十卷

陳氏曰毘陵錢紳仲撰宣和五年太守曰曾元禮未幾而有狄難至紹興十三年太守張彥聲始取而刻之

歷陽志十卷

陳氏曰郡守九華程九萬鵬飛教授天台黃宜達之撰慶元元年

黃州圖經四卷 附錄一卷

陳氏曰李諤祥符所修舊經亦頗有後人附益者

郡守李訖又以近事為附錄焉訖參政邴漢老之子也

齊安志二十卷

陳氏曰郡守呂昭問俾教授厲居正重修慶元已未也

濠梁志三卷

陳氏曰永嘉張季樗撰時嘉泰初元

無為志三卷

陳氏曰教授宋宜之撰太守柴瑾為之序

襄陽志四十卷

郡守胸山高夔命教授吳興劉宗幕官上蔡任沔
編纂爲書旣詳備而刊刻亦精緻圖志之佳者

襄沔記三卷

陳氏曰唐吳從政撰刪宗懍荆楚歲時記盛弘之
荊州記鄒閔甫楚國先賢傳習鑿齒襄陽耆舊傳
郭仲產襄陽記鮑堅南雍州記集成此書其記襄
漢事跡詳矣景龍中人自號栖閑子

渚宮舊事十卷

鼂氏曰唐知古撰自鬻熊至唐江陵君臣人物事
迹史氏傳記所載者悉編次之

房州圖志三卷

陳氏曰郡守毘陵陳宇撰

義陽志八卷

陳氏曰郡守河南關良臣撰紹熙二年也信陽軍
唐申州所謂申光蔡吳元濟所據竭天下之力以
取之者

長沙志五十二卷 續志十一卷

陳氏曰郡守趙善俊以紹熙二年命教授褚孝錫
等七人撰時止齋持漕相與考訂商略故序言當
與長樂志並也續志不著名氏錄紹熙以後事

長沙風土碑一卷

陳氏曰唐潭州刺史河南張謂撰前有碑銘後有湘中記載事跡七十件

衡州圖經三卷

陳氏曰郡守三山孫德輿行之撰嘉定戊寅刻

零陵志十卷

陳氏曰郡守徐自明嘉定己卯重修

零陵記十五卷

鼂氏曰皇朝陶岳撰永州地理志也今永州所部方三縣其所錄多連及數郡自序云以其皆零陵

舊地故收之

春陵圖志十卷

陳氏曰教授臨江章穎茂憲撰淳熙六年太守趙汝誼

九疑考古二卷

陳氏曰道州崇道主簿吳致堯格甫撰取春陵志所紀而爲詩以紀之宣和甲辰序

清湘志六卷

陳氏曰郡守永嘉陳峴壽南俾教授林瀛修嘉泰二年也

武昌志三十卷

陳氏曰郡守括蒼王信成之命教授許中應等撰武昌土俗編二卷

陳氏曰武昌令永嘉薛季宣撰記一縣之事頗詳紹興辛巳壬午間也其邑今爲壽昌軍

鄭城志十二卷

陳氏曰教授傅岩撰慶元戊午太守李楫

岳陽志甲二卷 乙三卷

陳氏曰甲集建安馬子嚴莊父乙集永嘉張聲道聲之所修皆郡守也

岳陽風土記一卷

陳氏曰宣德郎監商稅務建安范致明晦叔撰元符進士第二人仕至次對其在岳蓋謫官也

辰州風土紀六卷

陳氏曰教授縉雲田渭伯清撰隆興二年郡守徐彭年

成都古今記三十卷

鼂氏曰皇朝趙抃編抃自慶歷至熙寧凡四入蜀知蜀事爲詳摭其故實以類相從分百餘門時熙

寧七年

續成都古今集記二十二卷

陳氏曰知府事王剛中居正撰紹興三十年余嘗手寫洛陽名園記而題其後曰晉王右軍聞成都府有漢時講堂秦時城池及門屋樓觀慨然遠想欲一遊目其與周益州帖蓋數致意焉近時呂太史有感於宗少文卧遊之語凡昔人紀載人境之勝錄爲一編其奉祠亳社也自以爲譙沛真源恍然在目而竟之太極嵩之崇福華之雲臺皆將卧遊之噫嘻弧矢四方之志高人達士之懷古今一也顧南北分裂蜀在境內雖遠患不往爾往則至

矣毫竟嵩華視蜀猶邇封也欲往其可得乎然則太史之情其可悲也已余近得此記手寫一通與東京記長安河南志夢華錄諸書並藏而時自覽焉是亦卧遊之意云耳於時歲在己丑蜀故無恙也後七年而有虜禍秦漢故迹焚蕩無遺今其可見者惟此二記耳而板本亦不可復得矣嗚呼悲夫

劔南須知十卷

巽岩李氏曰宋如愚撰第一第二卷但編集舊史拚取或不倫第三第四第五第六凡四卷盡出唐

樊綽蠻書第七卷以下乃如愚自爲之文及所畫計策耳如熙寧買馬事誠西南要害異時或可補國史之闕云如愚眉山游場屋有俊聲不第以死亦可哀者

蜀記一卷

鼂氏曰皇朝張守約撰載孟昶初降至薨事

蜀記二卷

陳氏曰唐鄭曄撰雜記蜀事人物古跡寺觀之屬未詳何人

梁益志十卷

鼂氏曰皇朝任弁撰天禧中游宦於成都以蜀記數家其言皆無據乃引書傳刊正其謬自爲序

蜀三神祠碑文五卷

鼂氏曰皇朝井虔編任四川漕日哀梓潼灌口射洪三神祠碑文板記成此書

嘉州志二卷

鼂氏曰皇朝呂昌明以嘉州圖經增廣之

長樂志四十卷

陳氏曰府帥清源梁克家叔子淳熙九年序永嘉陳傅良君舉通判州事大略皆出其手

閩中記十卷

陳氏曰唐林誥撰本朝慶歷中有林世程者重修其兄世矩作序誥郡人養高不仕當大中時世程亦郡人也其言永嘉之亂中原仕族林黃陳鄭四姓先入閩可以證閩人皆稱光州固始之妄

建安志二十四卷 續志一卷

陳氏曰刪定官郡人林光撰慶元四年郡守永嘉張叔椿俾僚屬成之續志嘉定十二年府學士人所錄

清源志七卷

陳氏曰通判州事永嘉戴溪肖望撰時慶元己未太守信安劉頴

延平志十卷

陳氏曰郡守新安胡舜舉汝士與郡人廖拱廖挺哀集時紹興庚辰也序言與盱江志並行蓋其爲建昌守亦嘗修圖志

清漳新志十卷

陳氏曰司理參軍方杰撰嘉定六年太守趙汝誦蹈中也

鄞江志八卷

陳氏曰郡守古靈陳暉日華俾昭武士人李臯爲之時慶元戊午郡有鄞江溪故名

莆陽志十五卷

陳氏曰郡守趙彥勵懋訓紹興三年集郡士爲之武陽志十卷

陳氏曰教授葛元隲撰太守廖遲元達乾道六年也

晉江海物異名記三卷

陳氏曰祕書監莆田陳致雍撰致雍仕僞閩南唐後歸朝

廣州圖經二卷

陳氏曰教授王中行撰

南越志七卷

陳氏曰宋武康令吳興沈懷遠撰此五嶺諸書之最在前者也懷遠懷充之弟見宋書

番禺雜記一卷

陳氏曰攝南海主簿鄭熊撰國初人也莆田借李氏本錄之蓋承平時舊書未有河南少尹家藏六字不知何人也

番禺紀異五卷

鼂氏曰皇朝馮拯撰拯淳化中謫知端州見嶺表
鳥獸草木民俗物情舉異中原錄之爲三十門凡
三百事還朝上之

北戶雜記三卷

陳氏曰唐萬年縣尉段公路撰鄒平公之孫鄒平
文昌也

桂林志一卷

陳氏曰靜江教授江文叔編時乾道五年張維爲
帥撰次疏略刊刻草率亦不分卷次

桂林風土記一卷

陳氏曰唐融州刺史權知春州莫休符撰昭宗光
化二年也

桂林虞衡志二卷

陳氏曰府帥吳郡范成大至能撰范自桂移蜀道
中追記昔游

高涼志七卷

陳氏曰教授莆田劉棠撰太守春陵義太初嘉泰
壬戌也

南行錄一卷

陳氏曰唐房千里撰太和中謫高州旣北歸編山

川物產之奇人民風俗之異爲此書一名投荒雜錄

嶺表異錄三卷

陳氏曰唐廣州司馬劉恂撰昭宗時人

邕管雜記一卷

陳氏曰庫部員外郎范旻撰國初宰相質之子嶺

南初平旻知邕

嶺外代答十卷

陳氏曰永嘉周去非直夫撰去非癸未進士至郡
倅所記皆廣西事

南方草木狀一卷

陳氏曰晉襄陽太守嵇含撰

黃岩志十六卷

陳氏曰知縣永嘉蔡範甫撰嘉定甲申

旌川志八卷

陳氏曰知旌德縣歷陽李瞻伯山撰紹興三年謝

昌國爲序

涇川志十三卷

陳氏曰知涇縣濡須王栒叔永撰嘉定癸酉趙南
塘序之初縣歲有水患庚午冬叔永改卜於舊治

之東二里曰留村

新吳志二卷

陳氏曰知奉新縣盱江張國均維之撰新吳縣舊名嘉定甲戌

樂清志十卷

陳氏曰縣令信安袁采君載撰

脩水志十卷

黃氏曰分寧宰徐筠撰

連川志十卷

陳氏曰知連江縣豫章陶武克之撰嘉定乙亥

文獻通考卷第二百五

乾隆十二年校刊

文獻通考卷第二百五 經籍三十二

一五

文獻通考卷第一百六

鄱陽馬端臨貴與著

經籍考三十三

史地理時令

歷代宮殿名一卷

陳氏曰翰林承旨李昉等纂歷代及僭偽宮殿門闕樓觀園苑池館名無不畢錄

五嶽諸山記一卷

陳氏曰無名氏多鄙誕不經

王屋山記一卷

陳氏曰唐乾符三年道士李歸一撰

華山記一卷

陳氏曰不知名氏

西湖古跡事實一卷

陳氏曰錢塘進士傅牧撰以楊蟠百詠增廣共為一百八十三目紹興壬午序

青城山記一卷

鼂氏曰偽蜀道士杜光庭賓聖撰集蜀山若水在青城者悉本道家方士之言

峨眉志三卷

鼂氏曰皇朝張開撰峨眉山名也隋開皇十三年以名其邑奇勝冠三蜀郡守呂勤命開考圖經及傳記石刻綴輯成書析為十四門宋白吳中復詩文附於後

茅山記一卷

陳氏曰嘉祐六年句容令陳倩修

幙阜山記一卷

陳氏曰葛洪撰其山在豫章

豫章西山記一卷

陳氏曰贊皇李上文撰嘉祐丁酉歲

乾隆十二年校刊

文獻通考卷一百一 經籍三十三

二

玉笥山記一卷

陳氏曰唐道士令狐見堯撰山在新淦別本又有南唐及本朝事後人所益也

湘中山水記三卷

晉耒陽羅含君章撰范陽盧拯注其書頗及隋唐以後事則亦後人附益也

天台山記一卷

陳氏曰唐道士徐靈府撰元和中人也余假守臨海就使本道嘉熙丙申十月解郡符趨會稽治所道過之銳欲往遊會大雪不果改轅由驛道至今

以爲恨偶見此記錄之以寄卧遊之意

顧渚山記一卷

陳氏曰唐陸羽鴻漸撰鄉邦不貢茶久矣遺跡未必存也

廬山記五卷

鼂氏曰皇朝陳令舉舜俞撰先是劉煥嘗爲記令舉因而增廣之又爲俯視圖紀尋山先後之次云陳氏曰劉煥凝之李常公擇皆爲之序令舉熙寧中謫居所作

續廬山記四卷

陳氏曰南康守廣陵馬珩錄山中碑記之文以續
前錄

九華拾遺一卷

陳氏曰山居劉放至和二年自序曰滕天章作新
錄於前沈太守撰總錄於後博考傳聞復得三十
餘節

九華總錄十八卷

陳氏曰邑人程太古撰哀集諸家所記萃爲一編
也

武夷山記一卷

陳氏曰杜光庭撰
霍山記一卷

陳氏曰知循州林須撰山在循州境內

羅浮山記一卷

陳氏曰廬陵郭之美撰皇祐辛卯序

鴈山行記一卷

陳氏曰永嘉陳謙撰嘉定己巳游山直至絕頂得
所謂鴈蕩者前人蓋未之識也然繼其後者亦未
有聞焉

廬阜紀遊一卷

陳氏曰開封孫惟信季蕃撰嘗大雪登山至絕頂盡得其景物之詳嘉定初年也惟信能爲詩詞善談謔蓋嘗有官棄去不仕自號花翁遊江湖間人多愛之

何氏山莊次序本末一卷

陳氏曰尚書崇仁何異同叔撰其別墅曰三山小隱三山者浮石山岩石玲瓏山其實一也周回數里敘其景物序爲此篇自號月湖標韻清絕如神仙中人膺高壽而終其山間今蕪廢矣

湘江論一卷

陳氏曰太常博士潘洞撰

海濤志一卷

陳氏曰唐竇叔蒙撰

太虛潮論一卷

陳氏曰永泰縣令錢栖業述末稱天祐六年

海潮圖論一卷

陳氏曰龍圖閣學士燕肅撰進

潮說一卷

陳氏曰知錢塘縣張尹房撰凡三篇

西南備邊錄十三卷

異岩李氏曰唐李德裕撰今特存其第一卷而崇文總目亦止載一卷豈嘉祐以前已亡逸乎德裕之深謀遠慮雖至今可用也而所存止此可惜哉西南備邊志十二卷

陳氏曰嘉州進士鄧嘉猷撰紹興末犍爲有蠻擾邊初莫知其何種族也已而有能別識其爲虛恨蠻者時蜀邊久無事旣去而朝廷憂之詔有司經度嘉猷取秦漢以來訖於本朝凡史傳所載蠻事皆著於篇時乾道中也其爲志九爲圖一北邊備對六卷

陳氏曰程大昌撰淳熙中進禹貢圖孝廟因以北虜地理爲問對以虜無定居無文史不敢強言紹熙退居追采自古中華北狄樞紐相關者條列其地而推言之名曰備對

南北攻守類考六十三卷

陳氏曰監進奏院趙善譽撰進以三國六朝攻守之變鑒古事以考今地每事爲之圖

海外使程廣記三卷

陳氏曰南唐如京使章僚撰使高麗所記海道及其國山川事跡物產甚詳史虛白爲作序己未十

月蓋本朝開國前一歲也

大唐西域記十二卷

陳氏曰唐三藏法師元奘譯大總持寺僧辯機撰南詔錄三卷

陳氏曰唐嶺南節度巡官徐雲虔撰乾符中邕州遣雲虔使南詔所作上卷記山川風俗後二卷紀行及使事

至道雲南錄三卷

陳氏曰左侍禁知興化軍辛怡顯撰李順之亂餘黨有散入蠻中者怡顯往招安之繼馳賜蠻酋告

勅而歸遂爲此錄天禧四年自序或云此書妄也余在莆田視壁記無怡顯名字恐或然

契丹疆宇圖一卷

陳氏曰不著名氏錄契丹諸夷地及中國所失地遼四京記一卷

陳氏曰亦無名氏曰東京中京上京燕京

高麗圖經四十卷

陳氏曰奉議郎徐兢明叔撰宣和六年路允迪傅墨卿使高麗兢爲之屬歸上此書物圖其形事爲之說今所刊不復有圖矣兢鉉之後善篆書亦能

畫嘗自題保大騎省世家宣和書學博士又自號
自信居士

諸蕃志二卷

陳氏曰福建提舉市舶趙汝适記諸蕃國及物貨
所出

右地理

夏小正傳四卷

陳氏曰漢戴德傳給事中山陰傅崧卿注此書本
在大戴禮鄭元注禮運夏時曰夏四時之書也其
存者有小正後人以大戴禮抄出別行崧卿以正

文與傳相雜倣左氏經傳列正文其前時附以傳
且爲之注

荆楚歲時記四卷

鼂氏曰梁宗慄撰其序云傳元之朝會杜篤之上
巳安仁秋興之敘君道娛蜡之述其屬辭則已沿
其比事則未弘率爲小說以錄荆楚歲時風物故
事自元日至除日凡二十餘事

錦帶一卷

陳氏曰梁元帝撰比事儷語在法帖中章章月儀
之類也

玉燭寶典十二卷

陳氏曰隋著作郎博陵杜臺卿少山撰以月令爲主觸類而廣之博采諸書旁及時俗月爲一卷頗號詳洽開皇中所上

歲華紀麗四卷

鼂氏曰唐韓諤撰分四時十二月節序以事實爲偶儷之句附著之

陳氏曰其書采經子史傳歲時事類聚而以儷語間之

倪生月錄一卷

鼂氏曰唐韋行規撰分十二月雜記每月攝養種藝祈禳之術李翱爲之序

金谷園記一卷

陳氏曰題李邕撰館閣書目云唐中散大夫按邕字泰和江都人至北海太守世號李北海其父善注文選者也中散大夫唐文散階本傳不載不知書目別何所據唐世不應有兩李邕也

秦中歲時記一卷

陳氏曰唐膳部郎中趙郡李綽撰綽別未見此據中興書目云爾其序曰緬思庚子之歲荐周戊辰

之年庚子唐廣明元年戊辰梁開平二年也又曰
偶記昔年皇居舊事絕筆自嘆橫襟出涕然則唐
之舊臣國亡之後感傷疇昔而爲此書也按朱藏
一紺珠集曾端伯類說載此書有杏園探花使端
午扇市歲除儺公儺母及太和八年無名子詩數
事今皆無之豈別一書乎

咸鎬故事一卷

陳氏曰韋慎微撰其書與前大同小異竟不知何
人作也未卷却有神鬼大者號儺公母一語按館
閣書目秦中歲時記一名咸鎬歲時記

輦下歲時記一卷

晁氏曰唐李綽撰綽經黃巢之亂避地蠻隅偶記
秦地盛事傳之晚學

千金月令三卷

陳氏曰唐孫思邈撰

國朝時令十二卷

晁氏曰皇朝賈昌朝撰景祐初復禮記舊文其唐
月令別行三年詔昌朝與丁度李淑采國朝律歷
典禮百度昏曉中星祠祀配侑歲時施行約唐月
令定爲時令一卷以備宣讀後昌朝注爲十二卷

奏上頒行

陳氏曰唐因禮記舊文增損爲禮記首篇天寶中改名時令景祐初始命復禮記舊文其唐之時令別爲一篇遂命禮院修書官丁度等約唐時令撰定爲國朝時令以便宣讀蓋自唐以來有明堂讀時令禮也及昌朝解相印治郡五臣皆已淪沒乃采經史諸書及祖宗詔令典式爲之集解而上之兩朝藝文志詔因入閣讀時令問禮官五月朔日夏至百官入閣可否皆曰五月朔朝會合唐舊制雖是大祠比冬至圓丘禮成受賀在質明後無嫌

然據易象月令及蔡邕有閉關靜事不賀之說鄭康成據樂緯春秋之說夏至有前殿從八能作樂後漢嘗行其儀入閣讀令旣屬嘉禮在朔與假本無所礙惟夏至則於經義有妨移用七月朔又罷寶元二年宋庠論入閣之非兩制議入閣者是唐朝隻日紫宸殿受常朝儀若隔日行禮頗爲煩况今殿宇與舊不同乃止慶歷七年復詔來年四月一日讀時令禮院約定儀注以通禮參用唐宣政殿朔望朝參儀草定御文德殿皇帝服靴袍百官公服減正仗半不設樂尋停皇祐初又詔立夏讀

時令禮官邵必請四時皆讀然亦不果

歲時雜詠 續歲時雜詠

宣獻公宋庠及其孫剛叔撰濟北鼃無咎補之作序曰余元豐六年六月遇畢公叔於京師公叔言宋氏藏詩曰歲時雜詠者蓋宣獻公所集唐以前詩人之作髣髴具在公叔曰夫天地變化其情至微有不可道以辭者四時之間氣候物色俯仰輒異使一人言之雖其巧如簧恐不得與造物者爭功於是雜衆言而觀之不亦可乎宋氏故多賢而宣獻之孫曰剛叔尤篤志於學不愧其先人又常

集宋詩人之所爲爲續歲時雜詠以成其祖之意蓋若干篇且詩之作患言不能稱物者以得之偏也嘗試丹青衆言憑几肆目於方尺之間而四時氣候物色慘舒榮槁所以過乎吾前者每觀每異其致亦足樂也因以其集屬補之爲序補之復於公叔曰詩之亡久矣幽詩七月其記日月星辰風雨霜露草木鳥獸之事盛矣屈原宋玉爲離騷最近於詩而所以託物引類其感在四時可以慷慨而太息想見其忠潔剛叔於宋詩所取若此其亦有得於昔人之意乎宋有天下百年而詩之作中

間尤盛蓋叔之所取小大成備今觀其錄一時顯
人用是名世其尤宏傑者雖以磅礴天地呼吸陰
陽而成歲功可也其下者亦因所長而傳猶之一
氣候至生者皆作灼然而華嚶然而鳴以謂天地
之巧盡此矣

歲時雜記二卷

陳氏曰侍講東萊呂希哲原明撰希哲正獻公公
著之子呂滎陽公在歷陽時與子孫講誦遇節日
則休學者雜記風俗之舊然後團坐飲酒以爲樂
久而成編承平舊事猶有考焉

周平園序曰本朝承平歲久斯民安生樂業凡遇
節物隨時制宜雖有古有今或雅或鄙所在不同
然上而朝廷次而郡國下逮民庶驩娛熙洽未嘗
虛度則一也侍講呂公當全盛時食相門之德旣
目擊舊禮又身歷外官四方風俗皆得周知追記
於冊殆無遺者惟上元一門多至五十餘條百年
積累之盛故家文獻之餘茲可推矣慶元戊午秋
公之元孫仙遊邑大夫祖平以示平園老叟周某
竊有生晚不及見之歎云

右時令

文獻通考卷第二百六

文獻通考卷第二百七

鄱 陽 馬 端 臨 貴 與 著

經籍考三十四

史 譜牒 目錄

姓源韻譜一卷

陳氏曰唐張九齡撰依春秋正典柳氏萬姓錄世本圖摺摭諸書纂爲此譜分四聲以便尋閱古者賜姓別之黃帝之子得姓者十四人是也後世賜姓合之漢高帝命婁敬項伯爲劉氏是也惟其別之也則離析故古者論姓氏推其本同惟其合之

也則亂故後世論姓氏識其本異自五胡亂華百宗蕩析夷夏之裔與夫冠冕輿臺之子孫混爲一區不可遽知此周齊以來譜牒之學所以貴於世也歟

元和姓纂十一卷

鼂氏曰唐林寶撰元和中封閣某於諸家姓氏爲太原其人乃言非本郡憲宗令宰相命寶纂諸家姓氏李氏時各依四聲類集每韻之內則以大姓爲首

陳氏曰元和中朔方別帥天水閣某者封邑太原

以爲言上謂宰相李吉甫曰有司之誤不可再也宜使儒生條其源系考其郡望子孫職任並總緝之每加爵邑則令閱視吉甫以命寶二十旬而成此書絕無善本頃在莆田以數本參校僅得七八後又得蜀本校之互有得失然粗完正矣

李氏皇室維城錄一卷

陳氏曰屯田郎中李衢沔王長史林贊修止於僖宗蓋昭宗時所錄也

李氏房從譜一卷

陳氏曰唐洛陽主簿李匡文撰時爲圖譜官

聖唐偕日譜一卷

陳氏曰前賀州刺史李匡文撰序言前守職圖籍日撰天潢源派譜統務在省略直取相承一葉旁附首分諸房今特從聖唐以來列聖下諸王公主逐帝書出號曰偕日與日齊行之義也匡文字濟翁又有資暇集見於錄

唐宰相甲族一卷

陳氏曰唐韋述蕭穎士等撰自王方慶而下十有四家

唐相門甲族諸郡氏譜共一卷

陳氏曰不著名氏甲族八十六家氏譜自京兆八姓而下凡三百五十姓

唐杜氏家譜一卷

陳氏曰唐太子賓客杜信撰

唐鮮于氏卓絕譜一卷

鼂氏曰唐喬琳撰藝文志有其目

天下郡望氏族譜一卷

陳氏曰唐李林甫等天寶八載所纂并附五音於後

姓苑二卷

陳氏曰不著名氏古有何承天姓苑今此以李爲卷首當是唐人所爲

姓解三卷

陳氏曰鴈門邵思撰以偏旁字類爲一百七十門二千五百六十八氏景祐二年序

千姓編一卷

陳氏曰不著名氏末云嘉祐八年采真子記以姓苑姓源等書撮取千姓以四字爲句每字爲一姓題曰千姓編三字亦三姓也逐句文義亦頗相屬殆千字文之比云

陳郡袁氏譜一卷

陳氏曰袁陟世弼錄

陶氏譜一卷

陳氏曰懷州教授陶直夫錄侃之後也

帝王系譜一卷

陳氏曰武夷吳達公路撰政和壬辰也自漢迄周顯德每代略具數語其論曹操迫脇君后無復臣禮逆節已顯會其病死故篡竊之惡漏在身後昔人謂其不敢危漢者亦不覈其情耳此論與愚意

脗合

羣史姓纂韻譜六卷

陳氏曰永福黃邦先宋顯撰凡史傳所有姓氏皆有韻聚而著其所出建炎元年其兄邦俊宋英爲之序

古今姓氏書辯證四十卷

陳氏曰校書郎史館校勘臨川鄧名世元亞撰其子椿年緒成之

皇朝百族譜四卷

陳氏曰長沙丁維臯撰周益公爲之序時紹興末也僅得百二十有三家其闕遺尙多未能有續哀

集者

周平園序曰君子之著書也有心於勸戒而無意於好惡然後可以施當今而傳來裔昔者世系之學蓋嘗盛矣姓有苑官有譜氏族有志朝廷以是定流品士大夫以是通昏姻然行之一時其弊有不勝言者何也好惡害之也是故進新門則退舊望右膏粱則左寒賤進而右者以爲榮榮則夸夸則必侈退而左者以爲辱辱則怒怒則必怨以侈臨怨則生乎其時者悉力以逞憾出乎其後者貪名以自欺此正倫所以鑿杜固義府所以陷不辜

而無知如崇韜者所以流涕於尙父之墓而不耻也長沙丁公維臯宿學者儒慨然以譜牒爲任未
有聞而不求求而不得得而不錄也日哀月聚殆
且百家而又推其源流條其派別自微以至著由
遠以及近疏戚窮達可指諸掌如嘗從其父兄而
友其子弟也如與之同鄉黨而接姻媿也不亦博
而知要也哉維臯不鄙謂予使序其首子曰書不
待序也然維臯之意不可以不明蓋世臣巨室則
必書讀者可以知先烈之有貽而思保其閥閱也
方興未艾則必書讀者可以知將相之無種而思

大其門閭也至於四姓小侯重茵疊袞則知無兩
漢敗亡之禍勲臣勞舊傳龜襲紫則知無三世道
家之忌上以彰國朝人物之盛下以爲子孫昭穆
之辯向所謂有心於勸戒而無意於好惡者不在
茲乎他日其得益多其編益詳上之太史傳之薦
紳予亦將乞其副而寓目焉對千客而不犯一人
之諱或可勉也

容齋洪氏隨筆曰姓氏之書大抵多謬誤如唐貞
觀氏族志今已忘其本元和姓纂誕妄最多國朝
所修姓源韻譜又爲可笑姑以洪氏一項考之云

五代時有洪昌洪杲皆爲參知政事予按此二人乃五代南漢僭主劉龔之子及晟嗣位用爲知政事其兄弟本連弘字以本朝國諱故五代史追改之元非姓洪氏也此與洪慶善序丹陽弘氏云有弘憲者元和四年嘗跋輞川圖不知弘憲乃李吉甫之字耳其誤正同

闕里世系一卷

鼂氏曰皇朝孔宗翰修孔子家譜也唐藝文志有孔子系葉傳今亡其家所藏譜雖曰古本止敘承襲者一人故多疎略宗翰元豐末知洪州刊於牘

紹興中端朝者續之止於四十九代洪興祖又以史記并孔光孔僖傳及太子賢注與宰相世系諸家校正且作年譜列於卷首

史氏譜一卷

陳氏曰奉直大夫米憲錄蓋國初勲臣米信之後信五世爲芾元章又三世爲憲

右譜牒

唐藝文志四卷

陳氏曰新唐書中錄出別行監中有印本

吳氏西齋書目一卷

鼂氏曰唐吳兢錄其家藏書凡一萬三千四百六十八卷兢自撰書附於正史之末又有續抄書列於後

文選著作人名三卷

鼂氏曰唐常寶鼎撰纂文選所集文章著作人姓氏爵里行事及其著作之意

十三代史目三卷

鼂氏曰唐殷仲茂撰輯史記兩漢三國晉宋齊梁陳後魏北齊周隋史籍篇次名氏國朝杜鎬以唐五代書目續之

崇文總目六十四卷

鼂氏曰皇朝王堯臣等撰書刊正訛謬條次之凡四十六類計三萬六百六十九卷康定三年景祐中詔張觀李若谷宋庠取昭文史館集賢祕閣書成堯臣及提舉官聶冠卿郭稹加階邑編修官呂公綽王洙刁約歐陽修楊儀陳經各進秩有差國史謂書錄自劉向至毋嬰所著皆不存由是古書難考故此書多所謬誤

陳氏曰時撰定諸儒皆有論議歐公文集頗見數條今此惟六十六卷之目耳題云紹興改定

夾漈鄭氏曰崇文總目衆手爲之其間有兩類極有條理古人不及後來無以復加也道書一類有九節九節相屬而無雜揉又雜史一類雖不標別然分上下二卷卽爲二家不勝冗濫及觀崇文九節正所謂大熱而濯以清風也雜史一家隋唐二志皆不成條理今觀崇文之作賢於二志遠矣此二類往往是一手所編惜乎當時不盡以其書屬之也

又曰崇文總目出新意每書之下必著說焉據標類自見何用更爲之說且爲之說也已自繁矣何

用一一說焉至於無說者或後書與前書不殊者則強爲之說使人意怠且太平廣記者乃太平御覽別出廣記一書專記異事奈何崇文之目所說不及此意但以謂博采羣書以類分門凡是類書皆可博採羣書以類分門不知御覽之與廣記又何異崇文所釋大槩如此舉此一條可見其他大宋史館書目一卷

鼂氏曰皇朝史館書總計一萬五千一百四十二卷

邯鄲圖書志十卷

世禪 鼂氏曰皇朝李淑獻臣撰淑若谷之子也載其家
所藏圖書五十七類經史子集通計一千八百三
十六部二萬三千一百八十六卷其外又有藝術
志道書志書志畫志通爲八目

陳氏曰號圖書十志皇祐己丑自作序以示子孫
曰朋圭芻者其子壽朋復圭德芻也

成都刻石總目三帙

鼂氏曰皇朝劉涇撰元祐中蔡京帥成都以意授
涇纂府縣碑板幢柱自東漢初平迄僞蜀廣政凡
二百六十八

田氏書目六卷

鼂氏曰皇朝田鎬撰田偉居荆南家藏書三萬卷
鎬偉之子也因成此目元祐中袁默爲之序

羣書備檢十卷

鼂氏曰未詳撰人輯易書詩左氏公羊穀梁二禮
論語孟子荀子揚子文中子史記兩漢晉宋齊梁
陳後周北齊隋新舊唐五代史書以備檢閱

祕書省四庫闕書目一卷

陳氏曰亦紹興改定其闕者注闕字於逐書之下

集古錄跋尾十卷

陳氏曰歐陽修撰編述之意序文詳之世所共知
不復著

集古目錄二十卷

陳氏曰公子禮部郎官裴叔弼撰公既為跋尾二百九十六篇命裴撮其大要別為目錄裴之序云爾今改集中凡三百五十餘跋

歐公親書集古錄跋六卷

廬陵所刻凡二百五十篇視集中闕七之二

太宗御製御書目一卷

陳氏曰玉宸殿所藏兼有真宗御製序十四篇又

本稍多而無序文

真宗御製碑頌石本目錄一卷

陳氏曰凡九十名件乾興所刊板

龍圖閣瑞物寶目六閣書籍圖畫目共一卷

玉宸殿書數附

陳氏曰已上平江虎邱寺御書閣有元頒降印本傳寫得之

京兆金石錄六卷

陳氏曰北平田槩纂元豐五年王欽臣為序自為後序皆記京兆府縣古碑所在覽之使人慨然

金石錄三十卷

陳氏曰東武趙明誠德甫撰其所藏二千卷蓋倣歐陽集古而數則倍之本朝諸家蓄古器物欵識其考訂詳洽如劉原父呂與叔黃長睿多矣大抵好附會古人名字如丁字卽以爲祖丁舉字卽以爲伍舉方鼎卽以爲子產仲吉匱卽以爲偁姑之類遂古以來人之生世夥矣而僅見於簡冊者幾何器物之用於人亦夥矣而僅存於今世者幾何迺以其姓字名物之偶同而實焉余嘗竊笑之惟其傳會之過併與其詳洽者皆不足取信矣惟此書跋尾獨不然好古之通人也明誠宰相挺之之

子其妻易安居士李氏爲之作後序文亦頗有可觀

廣川藏書志二十六卷 書跋十卷 畫跋五卷

陳氏曰徽猷閣待制東平董道彥遠撰以其家藏書考其本末而爲之論說及於諸子而止蓋其本意專爲經設也

寶墨待訪錄二卷

陳氏曰禮部侍郎襄陽米芾元章撰記承平時故家所藏晉唐遺迹

羣書會記三十六卷

陳氏曰鄭樵撰大畧世間所有之書非必其家皆有之也

夾漈書目一卷 圖書志一卷

陳氏曰鄭樵記其平生所自著之書志者蓋述其著作之意也

集古系時錄十卷 系地錄十一卷

陳氏曰鄭樵撰大抵因集古之舊詳考其時與地而系之二書相爲表裏

秦氏書目一卷

陳氏曰濡須秦氏元祐二年有爲金部員外郎者

聞於朝請以宅舍及文籍不許子孫分割
藏六堂書目一卷

陳氏曰莆田李氏云唐江王之後有家藏誥命其藏書自承平時今浸以散逸矣

吳氏書目一卷

陳氏曰奉議郎漳浦吳與可權家藏閩中不經兵火故家文籍多完具然地濕苦蠹損

鼂氏讀書志二十卷

陳氏曰昭德鼂公武子止撰其序言得南陽公書五十篋合其家舊藏得二萬四千五百卷其守榮

州日夕讎校每終篇輒論其大指時紹興二十一年也其所發明有足觀者南陽公未知何人或云开度憲孟也未詳

遂初堂書目一卷

陳氏曰錫山尤氏尚書袁延之淳熙名臣藏書至多法書尤富嘗燼於火今其存亡幾矣

誠齋序畧曰延之於書靡不觀觀書靡不記每公退則閉戶謝客日記手抄若干古書其子弟及諸女亦抄書一日謂予曰吾所抄書今若干卷將彙而目之饑讀之以當肉寒讀之以當裘孤寂而讀之以當友朋幽憂而讀之以當金石琴瑟也乃屬予序其書目余記序之將借而傳焉

中興館閣書目三十卷

陳氏曰祕書監臨海陳騏叔進等撰淳熙五年上之中興以來庶事草創網羅遺逸中祕所藏視前世獨無歉焉殆且過之大凡著錄四萬四千四百八十六卷蓋亦盛矣其間考究疏謬亦不免

館閣續書目三十卷

陳氏曰祕書丞吳郡張攀從龍等撰嘉定十三年上以淳熙後所得書纂續前錄草率尤甚凡一萬

四十九百四十三卷

鄭氏書目七卷

陳氏曰莆田鄭寅子敬以所藏書爲七錄曰經曰史曰子曰藝曰方技曰文曰類寅知樞密院僑之子博聞強記多識典故端平初召爲都司執法守正出爲漳州以沒

寶刻叢編二十卷

陳氏曰臨安書肆陳思者以諸家集古書錄用九域志京府州縣繫其名物而昔人辯正審定之語具著其下其不詳所在附卷末

右目錄

文獻通考卷第二百七

文獻通考卷第二百八

鄱陽馬端臨貴與著

經籍考三十五

子儒家

漢藝文志儒家者流蓋出於司徒之官助人君順陰陽明教化者也游心於六經之中留意於仁義之際祖述堯舜憲章文武宗師仲尼以重其言於道爲最高孔子曰如有所譽者其有所試矣唐虞之隆殷周之盛仲尼之業已試之而效者也然惑者旣失精微而辟者又隨時抑揚違離道本苟以譁衆取寵後進

循之是以五經乖析儒學浸衰此則辟儒之患也

辟讀

辟曰

隋經籍志曰儒者所以助人君明教化者也聖人之教非家至而戶說故有儒者宣而明之其大抵本於仁義及五常之道黃帝堯舜禹湯文武咸由此則周官太宰以九兩繫邦國之人其四曰儒是也其後陵夷衰亂儒道廢缺仲尼祖述前代修正六經三千之徒並受其義至於戰國子思孟軻荀卿之流宗而師之各有著述發明其指所謂中庸之教百王不易者也俗儒爲之不顧其本苟欲譁衆多設問難便辭巧

說亂其大體致令學者難曉故曰博而寡要

漢志五十三卷八百三十六篇

入揚雄一家三十八家

隋志六十二部五百二十卷

通計亡書合六十七部六百九卷

唐志六十九家九十二部七百九十一卷

陸善經以下不著錄三十

九家三百七十一卷

宋三朝志五十一部三百七十一卷

宋兩朝志二十部一百四十三卷

宋四朝志二十四部一百九十七卷

宋中興志九十六家一百一十八部八百五十七卷

曾子二卷

乾隆十二年校刊

文獻通考卷八 經籍三十五

二

鼂氏曰曾子者魯曾參也舊稱曾參所撰其大孝篇中乃有樂正子春事當是其門人所纂爾漢藝文志曾子十八篇隋志曾子二卷目一卷唐志曾子二卷今此書亦二卷凡十篇蓋唐本也視漢亡八篇視隋亡目一篇考其書俱已見於大戴禮世人久不讀之文字謬誤爲甚乃以大戴禮參校之其所是正者至於千有餘字云

高氏曰曾參與公明儀樂正子春單居離曾元曾華之徒講論孝行之道天地事物之原凡十篇自脩身至於天圓已見於大戴禮篇爲四十九爲五

十八他又雜見於小戴禮畧無少異是固後人掇拾以爲之者歟劉中壘父子奏漢七畧已不能致辨於斯况他人乎然董仲舒對策已引其書有曰尊其所聞則高明行其所知則光大則書固在董氏之先乎又其言曰君子愛日及時而成難者不避易者不從旦就業夕自省可謂守業年三十四十無藝則無藝矣五十不以善聞則無聞矣質諸吾日三省吾身何其辭費邪

周氏涉筆曰曾子一書議道褊迫又過於荀卿蓋戰國時爲其學者所論也孔子言七十而從心所

欲不踰矩正指聖境妙處此書遽謂七十而未壞雖有後過亦可以免七十而壞與否已不置論而何以爲過何以爲免聖門家法無此語也

陳氏曰凡十篇具大戴禮後人從其中錄出別行慈湖楊簡注

子思子七卷

鼂氏曰魯孔伋子思撰載孟軻問牧民之道何先子思子曰先利之孟軻曰君子之教民者亦仁義而已何必曰利子思曰仁義者固所以利之也上不仁則不得其所上不義則樂爲詐此爲不利大

矣故易曰利者義之和也又曰利用安身以崇德也此皆利之大者也溫公采之著於通鑑夫利者有二有一己之私利有衆人之公利子思所取公利也其所引援易之言是也孟子所鄙私利也亦易所謂小人不見利不勸之利也言雖相反而意則同不當以優劣論也

楊倞注荀子二十卷

鼂氏曰趙荀况撰漢劉向校定除其重複著三十二篇爲十二卷題曰新書稱卿趙人名况當齊宣王威王之時聚天下賢士稷下是時荀卿爲秀才

年十五始來遊學至齊襄王時荀卿最爲老師後
適楚相春申君以爲蘭陵令已而歸趙按威王死
其子嗣立是爲宣王楚考烈王初黃歇始相年表
自齊宣王元年至楚考烈王元年凡八十一年則
荀卿去楚時近百歲矣楊倞唐人始爲之注且更
新書爲荀子易其篇第析爲二十卷其書以性爲
惡以禮爲僞非諫諍傲災祥尙強霸之道論學術
則以子思孟軻爲飾邪說文姦言與墨翟惠施同
詆焉論人物則以平原信陵爲輔拂與伊尹比干
同稱焉其指往往不能醇粹故後儒多疵之云

昌黎韓氏曰荀氏書考其辭時若不粹要其歸與
孔子異者鮮矣抑猶在軻雄之間乎孔子刪詩筆
削春秋合於道者著之離於道者黜去故詩春秋
無疵余故削荀氏之不合者附於聖人之籍亦孔
子之志歟孟子醇乎醇者也荀與揚大醇而小疵
東坡蘇氏曰昔者常怪李斯事荀卿旣而焚滅其
書大變古先聖王之法於其師之道不啻若寇讎
及今觀荀卿之書然後知李斯之所以事秦者皆
出於荀卿而不足怪也荀卿者喜爲異說而不讓
敢爲高論而不顧者其言愚人之所驚小人之所

喜也子思孟軻世之所謂賢人君子也荀卿獨曰亂天下者子思孟軻也天下之人如此其衆也仁人義士如此其多也荀卿獨曰人性惡桀紂性也堯舜偽也由是觀之意其爲人必也剛愎不遜而自許太過彼李斯者又特甚者耳今夫小人之爲不善猶必有所顧忌是以夏商之亡桀紂之殘暴而先王之法度禮樂刑政猶未至於絕滅而不可考者是桀紂猶有所存而不敢盡廢也彼李斯者獨能奮而不顧焚燒夫子之六經烹滅三代之諸侯破壞周公之井田此亦必有所恃者矣彼見其

師歷詆天下之賢人自是其愚以爲古先聖王皆無足法者不知荀卿特以快一時之論而荀卿亦不知其禍之至於此也其父殺人報仇其子必且行劫荀卿明王道述禮樂而李斯以其學亂天下其高談異論有以激之也孔孟之論未嘗異也而天下卒無有及者苟天下果無有及者則尙安以求異爲哉

程子曰荀卿才高其過多揚雄才短其過少韓子稱其大醇非也若二子可謂大駁矣且性惡一句大本已失

朱子語錄曰荀子儘有好處勝似揚子然亦難看
看來荀卿亦是剛明底人只是粗

陳氏曰漢志作孫卿子者避宣帝諱也至楊倞始
復改爲荀分爲二十卷而注釋之淳熙中錢佃耕
道用元豐監本參校江西漕司其同異著之篇末
凡二百二十六條視他本最爲完善

董子一卷

鼂氏曰周董無心撰皇朝吳秘注無心在戰國時
著書闢墨子

賈誼新書十卷

崇文總目漢賈誼傳本七十二篇劉向刪定爲五十
八篇隋唐皆九卷今別本或爲十卷

鼂氏曰誼著事勢連語雜事凡五十八篇考之漢
書誼之著書未嘗散軼然與班固所載時時不同
固紀云掇其切於世者容有潤益刊削無足怪也
獨其說經多異義而詩尤甚以騶虞爲天子之囿
官以靈臺爲神靈之靈與毛氏殊不同學者不可
不知也

高氏子畧曰皮日休讀賈誼新書嘆其心切其憤
深其辭隱而麗其藻傷而雅惟蘇公軾以爲非才

之難所以自用者實難惜乎賈生王者之佐而不能自用其才觀其過湘作賦以弔屈原紆鬱憤悶有遠舉之志其後卒以自傷哭泣至於天絕是亦不善處窮者矣夫謀之一不見用安知終不復用嗚呼此東坡以志量才識論誼者非誼所及也

朱子語錄曰賈誼新書除了漢書中所載餘亦難得粹者看得來只是賈誼一雜記藁耳中間事事有些箇 問新書曰此賈誼平日記錄藁草也其中細碎俱有治安策中所言多在焉

陳氏曰漢志五十八篇今書首載過秦書末爲弔也

湘賦餘皆錄漢書語且畧節誼本傳於第十一卷中其非漢書所有書輒淺駁不足觀決非誼本書也

揚子法言十三卷

鼂氏曰漢揚雄撰晉祠部郎中李軌注雄好古學見諸子各以其知舛駁不與聖人同是非頗謬於經故人時有問雄者常用法言應之誤此以象論語號曰法言每篇復爲序贊以發其大意然雄之學自得者少其言務擬聖人靳靳然若影之守形旣鮮所發明又往往違其本指正古人所謂畫者

謹毛而失貌者也

程子曰揚子無自得者也故其言蔓衍而不斷優柔而不決其論則曰人之性善惡混蓋雄規矩窄狹道卽性也言性已錯更何所得

陳氏曰凡十三篇篇各有序本在卷末如班固敘傳然今本分冠篇首自宋咸始李軌注本歷景祐嘉祐治平三降詔更監學館閣兩制校定然後板行與建寧四注本不同

溫公集注法言十三卷

鼂氏曰溫公集晉李軌唐柳宗元國朝宋咸吳秘

注公自言少好此書歷年已多今輒采諸家所長附以己意名集注李祠部注本及音義最爲精詳宋吳亦據李本而文多異同今參以漢書取其通者以爲定本先審其音乃解其義云

太元經十卷

鼂氏曰漢揚雄子雲撰雄作此書當時已誦其艱深其後字讀多異子嘗以諸家本參校不同者疏於其上且發策以問諸生云揚雄準易作太元經其自序稱元盛矣而諸儒或以爲猶吳楚僭王當誅絕之罪或以爲度越老子之書大抵譽之者過

其實毀之者失其真皆未可信然譬夫聽訟曾未
究其意烏能決其曲直哉今欲論元之得失必先
窺其奧然後可得而議也夫元雖準易然托始高
辛大初二歷而爲之故元有方州部家凡四重而
爲一首九贊通七百二十九贊有奇分主晝夜以
應三百六旬有六日之度首準一卦始於中準中
孚而終於養準頤二十四氣七十二候與夫二十
八宿錯居其間先後之序蓋不可得而少差也夫
易卦之直日起於漢儒之學舍四正卦取六十卦
之爻三百六十各直一日此元之所準者也然易

之卦直日其亦如元之首有序乎抑無也若亦有
之則雄之爲元不亦善乎不然則元之序亦贅矣
自復姤而爲乾坤十有二卦皆以陰陽之消長分
居十二月謂之辟卦固有序矣其餘一月而四卦
之序云何耳如中孚頤何以爲一日之卦也曰公
卿大夫侯者何謂也其所謂屯正於丑間時而左
行蒙正於寅間時而右行者其旨可得而聞歟又
一陽一陰者元相錯之法也然養爲陽而中不爲
陰水火木金土者元相傳之法也然姤爲金而美
不爲土其自相戾類如此豈得無說哉

朱子語錄曰揚子爲人思沉會去思索如陰陽消長之妙他直是去推求然太元亦拙底工夫蓋天地間只有一箇奇偶奇陽偶陰春少陽夏太陽秋少陰冬太陰自二而四自四而八只恁地推去都走不得揚子却添作三事事要作三截又且有氣無朔有日星無歲月恐不是道理其學本似老氏如清靜淵默等語皆是老氏意思

陳氏曰按漢志揚雄所叙三十八篇太元十九本傳三方九州二十七部八十一家七百二十九贊分爲三卷有首衝錯測摛瑩數文規圖告十一篇

皆以解剝元體蓋與本經三卷共爲十四今志云十九未詳初宋陸二家各依舊本解釋范望折中長短或加新意旣成此註乃以元首一篇加經贊之上元測一篇附贊之下爲九篇列爲四卷首測二序載之第一卷之首蓋猶王弼離合古易之類也卷首有陸績述元一篇

水心葉氏曰太元雖名幽深然旣枝葉扶踈獨說十餘萬言侯芭又受其辭則是雄所以作之意固嘗曉然號於人使皆可識不爲甚難明也至宋衷陸績范望乃皆創立註釋若昔未嘗聞知者如首

名以節氣起止贊義以五行勝尅最爲此書要會
不知自雄及芭親相傳授已如此邪或舊語果零
落而衷績等方以意自爲參測也以位當卦以卦
當日出於漢人若夫節候晷刻推其五行所寄而
吉凶禍福生之至元而益詳蓋農工小人所教以
避就趨舍者雄爲孔氏之學其書將經緯大道柰
何俛首效之且未有求其小而能得其大者也惜
乎其未講矣

范氏註太元經解十卷

鼂氏曰吳范望叔明註其字云子雲著元桓譚以

爲絕倫張衡以擬五經白侯芭受業之後希有傳
者建安中宋衷陸續解釋之文字繁隈今以陸爲
本錄宋所長訓理其義爲十卷耳以首分居本經
之上以測散處贊辭之下其前又有陸續序以子
雲爲聖人云

說元一卷

鼂氏曰唐王涯廣津撰涯始以貞元丙子終於元
和已丑二十六年間註太元爲六卷今不之見獨
此書行於世凡五篇明宗一立例二揲法三占法
四辯首五

巽岩李氏曰自晉范望而後爲元學者無聞而涯獨能名家諸儒共宗之涯別有經註六卷行於世此特其大畧耳揲法所稱并芳之後便都數之不中分蓋誤也若爾則終不成七八之數當云又中分其餘而三數之但不復掛一然本多如此今姑仍其舊使觀者自擇焉

宋惟幹太元解十卷

鼂氏曰皇朝宋惟幹註惟幹嘗得太元古本於昭應咸平中知滑臺取宋衷陸績范望三家訓解別爲之註仍作太元宗旨兩篇附於後其學蓋師濟

東田告司馬溫公所謂小宋者也

徐庸註太元經解十卷

鼂氏曰皇朝徐庸註庸慶歷間人也以范望解指義不的因王涯林氏諸解重爲之註取王涯說元附於後自爲元頤通名之爲太元性總其自序云爾又多改其文字如以屹爲仡以婉爲危以壯凡爲札乃以孿爲孿以稚爲推之類其所謂林氏者瑀也賈文元嘗闢瑀之姦妄於朝

章氏太元經註十四卷 疏三十卷

鼂氏曰皇朝章沆撰嘉祐中成都帥蔣棠獻其書

於朝詔書褒寵賜號冲退處士實錄晉字隱之雙
流人通經術善屬文性恬淡屏居林泉以養生治
氣爲事

巽岩李氏曰其說以范望爲宗望所否者輒改正
之大抵元之吉凶專在晝夜而子雲之辭或奇奧
難曉諸家往往迷悞指凶爲吉違背經義晉獨以
晝夜訂其辭於吉凶無所差比諸家誠最優焉晉
成都人字隱之博通五經尤長於易與太元王素
趙抃守蜀皆賓禮之賜冲退素所請也晉將死其
鄉人夢晉以小童自隨投謁告別曰此間囂塵非

修行地吾歸闔苑矣晉蓋明術數得道者云

陳漸演元十卷

鼂氏曰皇朝陳漸撰漸堯佐之族子也國史有傳
凡十四篇漸謂史以揚雄非聖人而作經猶吳楚
僭王按子雲法言解嘲止云太元然則經非其自
稱弟子侯芭之徒尊之耳

太元淵旨一卷

鼂氏曰右皇朝張揆撰

太元經疏十八卷

鼂氏曰皇朝郭元亨撰元亨謂雄之作元傳之侯

芭後獨有張衡桓譚張華見而稱嘆吳郡鄒伯岐
求本不能得宋衷爲訓陸績爲解范叔明王涯亦
注之皆未明白元亨在蜀自淳化末迄於祥符八
年僅三十年撰成今疏又云太元潤色於君平未
知何所據而言然
巽岩李氏曰其疏專主范望雖講論極詳然於望
本注無所增益也元亨自謂得師於蜀而不著其
師之名氏蜀人蓋多元學疑嚴揚所傳固自不絕
但潛伏退避非遇其人則鮮有顯者耳元亨之本
末亦未詳

太元發隱三篇

巽岩李氏曰章啓撰啓有太元講疏四十九卷其
說甚備發隱之作蓋在講疏以前其大略可見矣
下篇所稱王莽旦筮遇於之一五七乃宋衷陸績
舊註本寓言也而啓謂宋陸皆居漢世去揚雄未
遠必得之傳聞故因用之要恐非實耳然亦不害
學者觀其意焉可也

溫公集註太元經十卷

鼂氏曰司馬光君實集漢宋衷解話吳陸績釋文
晉范望解贊唐王涯註經及首測宋惟幹通註陳

漸演元吳祕章義七家爲此書自慶歷至元豐凡三十年始成其直云宋者衷也小宋者惟幹也惟幹漸祕皆國朝人溫公說元曰班固稱諸儒或譏揚雄非聖人而作經猶春秋吳楚之君僭號稱王余亦私怪雄不贊易而別爲元易之道其於天人之蘊備矣而雄豈有以加之更乃爲一書且不知其焉所用之故亦不謂雄宜爲元也及長學易苦其幽奧難知以爲元者賢人之書校於易其義必淺其文必易夫登喬山者必踐於塊埤適滄海者必沿於江漢故願先從事於元以漸進於易庶幾

乎其可跂而望也於是求之積年始得觀之初則溟滓漫漶畧不可入乃研精易慮屏人事而細讀之數十過參以首尾稍得窺其梗槩然後喟然置書嘆曰嗚呼揚子雲真大儒者邪孔子沒後知聖人之道者非子雲而誰孟荀殆不足擬况其餘乎觀元之書明則極於人幽則盡於神大則包宇宙細則入毛髮合天地人之道以爲一究其根本示人所出胎育萬物而兼爲之母若地履之而不可窮也若海挹之而不可竭也蓋天下之道雖有善者蔑不易此矣考之於渾元之初而元已生察之

於當今而元非不行窮之於天地之季而元不可
亡叩之以萬物之情而不漏測之以鬼神之狀而
不違槩之以六經之言而不悖藉使聖人復生視
元必釋然而笑以爲得已之心矣乃知元者以贊
易也非別爲書以與易角逐也何歆固知之之淺
而過之之深也

陳氏曰集取宋衷以下七家之說而斷之以己意
太元釋文一卷

陳氏曰相傳自侯芭虞翻宋衷陸績互相增損非
後人所作也吳秘嘗作音義豈卽此邪

元解四卷 元歷一卷

陳氏曰右丞襄陵許翰崧老撰所解十一篇通温
公註爲十卷倣韓康伯註繫辭合王弼爲全書之
例也大抵元首如彖贊如爻測如象文如文言攤
瑩規告如繫辭數如說卦衝如序卦錯如雜卦之
類其於易也規規然擬之勤矣太元歷者亦翰所
傳云温公手錄不著何人作

易元星紀圖一卷

鼂氏曰從父詹事公撰以温公元歷及邵康節太
元準易圖合而譜之以見揚雄以首準卦非出私

意蓋有星候爲之機括且辯正古今諸儒之失如
羨不當準臨夷不當準大壯之類凡此難與諸家
口舌爭觀譜則彼自屈矣此譜元所以作也

文獻通考卷第二百八



